

四庫全書

史部

欽定四庫全書

史部

建炎雜記甲集卷二

詳校官編修臣范來宗

編修臣程嘉謨覆勘

總校官編修臣王燕緒

校對官助教臣卜維吉

謄錄監生臣魏淳曜

欽定四庫全書

史部十三

建炎雜記甲集

政書類一 通制之屬

提要

臣等謹案建炎雜記四十卷宋李心傳撰心

傳有建炎以來繫年要錄已著錄心傳長於

史學凡朝章國典多所諳習是書取南渡以

後事跡分門編類甲集二十卷分上德郊廟

典禮制作朝事時事故事雜事官制取士財

賦兵馬邊防十三門乙集二十卷少郊廟一  
門而未卷別出邊事亦十三門每門各分子  
目雖以雜記為名其體例實同會要蓋與建  
炎以來繫年要錄互相經緯者也周密齊東  
野語嘗論所載趙師罽犬吠乃鄭斗所造以  
報撻武學士之憤許及之曲膝費士寅狗齎  
亦皆不得志報私讐者撰就醜詆韓侂胄僭  
逆之類悉無其實云云蓋掇拾羣言失真者

固亦不免然於高孝光寧四朝禮樂刑政之大以及職官科舉兵農食貨無不該具首尾完贍多有馬端臨文獻通考章俊卿山堂考索及宋史諸志所未載故通考稱為南渡以來野史之最詳者王士禎居易錄亦稱其大綱細目粲然悉備為史家之巨擘言宋事者當必於是有所徵焉其書在宋有成都辛氏刊本并冠以國史本傳登宣取繫年要錄指揮

數通今惟寫本僅存案張端義貴耳三集序  
稱心傳告以朝野雜記丁戊二集將成則是  
書尚不止於甲乙二集而書錄解題及宋史  
本傳均未之及殆以晚年所輯書雖成而未  
出故世不得見歟乾隆四十六年八月恭校  
上

總纂官臣紀昀臣陸錫熊臣孫士毅

總校官臣陸費墀

欽定四庫全書

建炎雜記甲集卷一

宋 李心傳 撰

君德

寧皇登位

前載憲聖策立寧皇事雖黃屋初非堯心而天下皆謂宜立光皇當勵精之初薛公圭投北宮麗正書言頗切至蓋孝宗之意初主沂邸光皇亦屬意焉書畧曰庶之

亂嫡自宮闈始夫庶之亂嫡則支之亂本之漸也而支之亂本則異姓之亂同姓之漸也異姓之亂同姓則又外域亂中國之漸也又曰陛下踐阼今既五年皇子嫡長已踰弱冠玉冊之命未布而青宮之席尚虛又曰陛下不即天下之安而冒天下非常之危不守天下之常而覆天下不測之變採之游言殊有驚悸採之國論曾無建明又曰祖父互疑天地幾變子孫猜防上下解體支嫡交忌臣民異心臣始聞之未敢遽信今既日久不



容無惑道路之言喧傳百端中外之心憂疑萬狀燕公  
聞之寧無懷貳乘輿聞之莫或改容藩邸聞之未免憂  
禍此何等事也而俾見於世此何等議也而俾聞於時

陛下

謂孝宗

盍亦自思其何以得此議固宜自盡吾為祖

為父之道也上

光宗

盍亦自思其何以得此議固宜自盡

吾為子為孫之道也又曰陛下曾知有竊議之人乎否  
也問之左右問之在朝蓋有君也不敢言矣問之主上  
蓋有父也不敢言矣問之太子蓋有祖矣仍有父也尤

不敢言矣為臣之言不通於君為子之言不通於父為  
孫之言不通於祖而微臣僭言之死有餘地矣如蒙聖  
恩特垂天聽君臣之情通自臣言始父子之情通自臣  
言始祖孫之情通自臣言始臣雖身首異處而忠孝獲  
書於史冊雖瞑目於地下將有辭以對越先朝十御皇  
帝在天之靈矣蓋紹熙五年甲寅歲所上也嘉熙壬寅  
公圭之里人陳貴明為跋其書云懶菴趙蹈中載寧廟  
之立寔出於水心先生之建議雖然水心之議特出於

一時之危疑蹈中所載寧廟登極之詔遲下數月襄州之亂作矣特以詔至而止嗚乎孰知有獻策於承平無事者哉初光宗疾不能喪襄陽士人陳應詳陰連北方鄧州叛黨欲殺守臣張定叟用縞素代皇帝為太上執喪且舉襄以順地適寧皇登極之詔甫三日而至陳遂變色寢謀旋為其黨所訴定叟臨閱場問之曰朝廷負爾耶太守負爾耶命各將士射之先誌其箭中其肝者有某賞中其心者有某賞中其體若肢者有某賞發陳之

篋惟縞巾數千云先是趙蹈中具載水心贊嘉邸之語  
數十百親筆其顛末紹翁未之見也薛君永嘉士人子  
夢桂嘗以其書彙示紹翁當時陳議者恐不止一薛然  
曲突徙薪之不賞自昔然矣

景靈行香

百官赴景靈行香僧道分為兩序用其威儀咒語初僧  
徒欲立道流右且曰僧而後道至交訟久之秦檜批其  
牘云景靈太乙寔崇奉道教之所道流宜居上至今定

為制云紹翁以為祖宗在天之靈必不顧歆於異教且市井髡髻之庸人宜皆斥去近者淳祐進書例用僧道鑊鼓前導朝廷有旨勿用蓋得之矣惜未施於原廟

### 高宗六飛航海

揮塵第三錄第一卷載高宗六飛航海事有宣教郎知餘姚縣李頴士者募鄉兵數千列其旗幟以捍拒之敵既不知其地勢不測兵之多寡為之小却徬徨不敢進者一晝夜由是大駕得以自定海登舟航海事平頴士

遷兩官擢通判州事穎士字茂實福州人登進士第紹  
興中為刑部郎中紹翁謹按揮麈所載李某事迹皆當  
蓋紹翁本生祖也本生祖其先為光州固始人徙居建  
之浦城非福州也秀岩李公心傳朝野僉載以真公德  
秀常以書義魁鄉舉真公業詞賦亦嘗為魁著述斯難  
矣不知秀岩曾刊定否

寧皇御舟

張巨濟字宏圖福清人嘉泰間上書寧宗以慈懿殯陵

今在湖曲若陛下遊幸則未免張樂此豈履霜露之義  
寧皇感悟其言旋轉一秩由此湖山遂無清蹕之聲非  
特儉德云御鷁至沉於波臣黃洪詩云龍舟大半沒西湖  
便是光皇節儉圖三十六年安靜裏棹歌一曲在康衢

忠清廟制詞

顯仁太后龍輶將渡會稽上聖孝出於天性預恐風濤  
為孽遙於宮中默禱忠清廟及篙御既戒浪平如席上  
命詞臣行制詞以封之曰追惟文母將祔裕陵闕殿告

成容車將發奈以大江之阻具形羣辟之憂既竭於誠  
亟孚神聽某王一節甚偉千古如存帖然風濤既賴幽  
冥之相煥乎天寵用昭崇極之恩尚綏於四方之民以  
綿爾百世之祀可特封忠壯英烈威顯王蓋於舊號四  
字上加忠壯二字

高宗御書石經

高宗御書六經嘗以賜國子監及石本於諸州庠上親  
御翰墨稍倦即命憲聖續書至今皆莫能及



光皇御製

孝宗崇憲聖母弟之恩故稱琚兄弟皆以位曰哥至光  
宗體孝宗之意故稱琚兄弟曰舅琚尤聖眷後苑安榴  
盛開光皇以廣團扇自題聖作二句曰細疊輕綃色倍  
濃晚霞猶在綠陰中命琚足之公再拜援筆即書曰春  
歸百卉今無幾獨立清微殿閣風上稱嘆者久之憲聖  
於二王中獨導孝宗以光皇為儲位故公落句有獨立  
之詠寄意深矣團扇猶藏其家又有石刻火後俱不存

云

孝宗御製賜吳益

孝宗以太母故加眷吳郡王益益太母弟也秋氣向清  
聖意怡懌至於手書御札一聯云稱此一天風月好橘  
香酒熟待君來命近璫持賜益益入對頓首稱謝上曰聊  
復當折簡耳

建炎雜記甲集卷一

欽定四庫全書

建炎雜記甲集卷二

宋 李心傳 撰

郊廟

宮省祠觀陵寢附

南北郊明堂

自元豐分南北郊至政和乃克行之建炎二年上祀圜丘獨祭上帝而配以太祖用元豐禮也紹興十三年郊祀始設大神大元及太祖太宗配位自天地至從祀諸

神凡七百七十有一蓋元祐禮云明堂者仁宗皇祐中始行之其禮合祭天地並配祖宗又設從祀諸神如郊丘之數政和七年既建明堂於大內自是歲以九月行之然獨祀上帝而配以神宗惟五帝從祀紹興元年上在會稽將行明堂禮命邇臣議之王剛中居正為禮部郎官首建合祭之議宰相范覺民主之乃以常御殿為明堂但設天地祖宗四位而已四年始設從祀諸神七年復祀明堂而徽宗崩問已至中書舍人傅崧鄉請增

設道君太上皇帝配位於太宗之次禮部侍郎陳公輔  
言道君方在几筵未可配帝乃不行三十一年始崇祀  
徽宗於明堂以祀上帝而祀五天帝於堂上五官神於  
東廂罷從祀諸神位用熙寧禮也乾道以後說者以德  
壽宮為嫌止行郊禮淳熙六年用李仁父周之充議復  
行明堂禮之祭遂合祭並侑焉逮十四年高宗崩明年  
季秋乃用嚴父之典今郊禮從紹興明堂從皇祐惟歲  
時帝祀則以太祖配冬至園丘太祖配祈穀大雩高宗

配明堂宗祀蓋尤延之為禮官時所請云

郊丘明堂之費

隆興二年孝宗初行大禮時湯慶公

思退

為左相上問

郊與明堂之費如何戶部尚書韓仲通曰郊之費倍於明堂侍郎錢端禮言不過增二十萬若從祖宗故事一切從儉自宜大有減省上以為然乃照除事神賞軍外並從省約會其秋金入寇遂用明年正月辛亥朔旦行之上自宮徂郊乘玉輅用鹵簿之半禮畢乘平輦而

歸乾道三年再郊始復備五輅歸用大安輦馬

當喪罷祭廟

自咸平以來人主有三年之喪則罷廟祭熙寧元年郊祀英宗喪未除然前二日猶朝獻景靈宮前一日朝饗太廟元祐元年宗祀亦如之紹興七年上祀明堂於建康時徽宗未祔廟太常少卿吳表臣奏行其禮翰林學士朱震以為不然監察御史趙渙言升祔以後宗廟常祭皆不當廢而當喪享廟亦有顯據左氏傳曰烝嘗禘

於廟曾子問曰已葬而祭此不當廢也詩頌成王即位諸侯助祭春秋文公四年十二月成風薨六年十月猶朝於廟此顯據也疏奏詔侍從臺諫議議者吏部尚書孫近等十五人言按唐故事以皇帝將郊禮奏告太廟太清宮蓋告也非祭也上從之三十一年當宗祀其夏已聞欽宗之喪禮部侍郎金安節言宮廟皆當以大臣攝事亦不從紹熙五年明堂孝宗未卒哭時趙汝愚朝獻景靈宮嗣季王伯圭朝饗太廟而上獨祀明堂慶元



六月上執光宗之喪甫踰月而當行大禮乃命右丞相謝深甫款天興之祠嗣濮王不儔攝宗廟之祭盖用紹熙禮云

太祖正東嚮之位

國朝自太祖追王四親以來每遇禘祫祖宗以昭穆相對而虛東嚮之位王介甫用事以為僖祖以上世次不可知則僖祖之有廟與后稷疑無以異當時諸儒韓持國輩辨之不從熙寧八年夏禘於太廟以尊僖祖自是

無敢議者紹興五年八月董舍人弁為吏部員外郎始請正太祖東嚮之位上命防秋後議之明年春王侍郎普為太常丞復以為請趙元鎮為相白行之下侍從臺諫禮官集議上謂元鎮曰太祖開基創業始受天命裕享居東嚮之位合於禮今必無異議而諫官趙需者乃謂上皇在遠宗廟之事未容輕議事遂止淳熙末尤延之尚書為江西提刑復建此議紹興初入為宗伯遂申言之詔侍從臺諫兩省與禮官同議其後亦不行時丘

宗卿侍郎在奉常亦以為言而議終格逮趙子直得政  
遂決行之朱元晦侍講獨言僖祖皇家始祖不當一旦  
并行祧毀不從故事祔廟二百年而後正太祖之位盖  
自紹熙五年冬始而別建一殿以奉祧主於大殿之西  
今謂四祖殿者是也

### 九廟七廟之制

太廟自仁宗以來皆祀七世崇寧初蔡京秉政始取王  
肅說謂二祧在七廟之外乃建九廟奉祖宣祖咸歸本

說焉然莽已營九廟唐明皇又用之非始於蔡京也紹興中徽宗附廟以與哲宗同為一世故無所祧及升祔欽宗始祧翼祖高宗與欽宗同為一世亦不祧由是淳熙末年太廟祀九世十二室及阜陵復土趙子直為政遂祧僖宣二祖而祔孝宗朱元晦在經筵獨以九廟為政子直不從元晦議遂格及光宗祔廟復不祧今又祀九世矣

太廟景靈宮天章閣欽先殿諸陵上宮祀式

國朝宗廟之制太廟以奉神主一歲五享朔祭而月薦  
新五享以宗室諸王朔祭以太常卿行事景靈宮以奉  
塑像歲四孟享上親行之帝后大忌則宰相率百官行  
香僧道士作法事而后妃六宮皆亦繼徃天章閣以奉  
畫像時節朔望帝后生辰日皆徧薦之內臣行事欽先  
孝思殿亦奉神上日焚香而諸陵之上宮亦有御容時  
節酌獻如天章閣每歲寒食及十月朔宗室內人各徃  
朝拜春秋二仲太常行陵園季秋監察御史檢視太廟

之祭以俎豆景靈宮用牙盤而天章閣等以常饌用家人之禮云迄今不改光堯之崩詔從官議廟號洪景廬內翰請稱世祖從官多同之禮官顏師魯尤衰鄭僑奏疏曰臣等切惟宗廟之制祖有功而宗有德創業垂統功莫大焉繼體守文德莫茂焉藝祖帝規創大業為宋太祖太宗皇帝混一區夏為宋太宗自真宗至於欽宗聖聖相傳廟制一定萬世莫易仰惟大行太上皇帝宏濟多難紹開中興功德兼隆上足比太祖陛下孝思罔

極是所以盡尊親之意稱祖立廟有何不可然在記子為父屈亦有尊也雖聖不先父食大行太上皇帝親為徽宗之子子而為祖父而為宗則難以正尊卑昭穆之序今議者不過以光武為比太上皇帝中興大業雖與光武同然漢自高祖至於平帝國統中絕光武以長沙王之後起布衣之中不與哀平相為繼承其稱祖無嫌一也漢制每帝即位輒立廟不列昭穆故明帝更為光武立廟號為世祖廟蓋不與高祖為一其稱祖無嫌者二也

太上皇帝功德盛大禮當尊崇然實繼徽宗之正統以子繼父非若光武比也本朝叅稽三代之制列昭穆於太廟非若漢世可以更為廟也仰惟大行太上皇帝孝悌之至冠於百王將來祔廟若在父廟之下而稱祖竊恐在天之靈有所不安若更為廟如東漢則於國朝之制豈容違戾質之典禮則不合驗之人情則不順夫昭穆尊卑之序所以闡綱常係事體者甚大豈易輕變乞以臣等此章付集議所叅稽禮經博采衆論施行從之



遂定為高宗矣

光堯廟號議

初高宗廟號未定殿中侍御史冷世光監察御史吳博古黃謙共議謂宜稱聖宗權兵部侍郎林栗又議宜存尊號中十六字而益以聖神光孝四字廟號堯宗詔侍從臺諫兩省禮官同議時栗又奏謂唐高宗有嬖后國祚幾危非所宜比皇太后聞其說必欲易之於是從官于文价洪邁韓彥質葉翥劉國瑞王信李燾謝諤吳琚

章森諫官謝諤禮官顏師魯黃黼倪思張體仁沈鑑等  
同奏聖字乃契丹隆緒號恐難用也又謚法雖有堯字  
乃後人採取傅會之說金人亦有名宗堯者斷不可用  
惟高字或光字為宜粟又固爭以堯字為可用太常少  
卿尤袤奏曰昔曹操朱溫皆號太祖本朝太祖用之不  
嫌者名實所在自有定論也堯乃古號不可單用為號  
烈宗劉聰楊渥僭偽之主皆嘗用之光字雖若可用然  
字體太輕士庶名字多或用之於是稱藝祖者以為種

藝之藝建位天地開植宗社滋養萬物傳之皆無藝也  
大臣主之復與侍從臺諫禮官議議者皆謂孔安國注  
舜云藝者文也書之取義止於如此又經典中有才藝  
伎與成而下之文可以為重可以為輕况施之於祖猶  
有可據施之於宗則失之牽合臣等謂極天下之美而  
前世未用者莫如大之一字易曰大哉乾元語曰大  
哉堯之為君大之為義其如此請號曰太宗於是內出  
詔曰堯自載於謚法唐高祖亦謚神堯用為廟號似亦

無嫌可令議定奏聞禮部太常寺奏堯舜乃二帝之名  
唐高祖謚神堯太上皇帝尊號光堯猶曰比德於堯而  
又過之爾今獨取堯之一字以為廟號有所未安本朝  
開基中興皆在商丘國號大宋則今擬廟號獨取乎商  
之高宗實為有證詔從初議遂定為宗方羣臣之集議  
也又有欲稱成宗者袁曰此吳越錢元瓘偽號也議者  
乃止其後壽康升附遂號為光宗云

高宗孝宗配享功臣

祖宗故事大臣配享皆附廟後議之若趙韓王曹秦王  
之配享太祖蓋真宗咸平時而韓魏王曾魯公之配享  
英宗皆其身薨日降制亦在祔十數年後永思陵復土  
翰林學士洪邁言聖神文武憲孝皇帝祔廟有期所有  
配食臣寮先期議定臣兩蒙宣諭欲用文武臣各兩人  
文臣故宰相贈太師秦國公謚忠穆呂頤浩特進觀文  
殿大學士謚忠簡趙鼎武臣太師蘄王謚忠武韓世忠  
太師魯王謚忠烈張俊此四人皆一時名將相合於天

下公論望付侍臣詳議以聞議者皆以為宜遂從之秘書少監楊萬里獨謂張丞相浚不與配食為非宜爭之因罷補外去國焉孝宗既祔廟詔以故相陳康伯侑食寶文閣待制吳總上疏請以其父璘配享廟廷不報

中興典祀

中興典祀冬至圜丘夏至皇帝祇

太祖配

孟春祈穀孟夏

雩祀神州地祇

並太祖配

季秋明堂

淳熙十六年閏五月改高祖配

感生帝

僖祖配已上帝執亮獻官

高禘

青帝配以伏羲高辛氏

朝日

大明

夕月

夜明

九宮貴

神 太一攝提樞主招搖夫 熒惑 常五宣 大社大稷 土右

出火納火祀大臣

商丘宣明王配

蜡祭

東蜡后稷大明配以神農神農無配西蜡夜明

配以北蜡神農配以后稷

五方嶽鎮

無配

四海四瀆

無配

風雨雷師

無配

先

農

神農后稷

先蠶

先蠶

至聖文宣王

克國公鄒國公

昭烈武成王

留侯

祚

德廟

強濟公英畧公啟佑公

渡江後郊廟宮省

紹興四年高祖在平江將還臨安始命有司建太廟十二年和議成乃作大社大稷皇后廟都亭驛太學十三年

金匱要略卷之二  
卷二  
築園丘景靈宮高禩壇秘書省十五年依內中神御殿  
十六年廣太廟建武學十七年作玉津園太一宮萬壽觀  
十八年築九宮貴神壇十九年建太廟齋殿二十年作  
玉牒所二十二年作左藏庫南省倉二十五年建執政  
府二十六年築兩相第太醫局二十七年建尚書六部  
大兄都二十年而郊廟宮省始備焉

今園丘 青城齋宮

今園丘在龍華寺之西壇四城上城縱橫七丈下城二



十二丈分三陛陛七十二級壇及內壇凡九十步中壇外壇共二十五步紹興十三年楊存中領殿前司所築也東都舊有青城齋宮渡江後以幕屋絞縛為之每郊費緡錢十餘萬淳熙末張端明初為京尹始議築齋宮可以勞而永逸上從之宇文寶學价時為兵部尚書因宿直奏曰陛下方經畧河南今築青城是無中原之意也上以為然亟命罷役

### 京太廟

京太廟舊十六楹其十四楹為七室東西二楹為夾室  
康定元年冬直秘閣趙希言請倣古制每主為一廟一  
寢或未能然則更立祧廟事下禮部宋子京等言晉宋  
多同殿異室祖宗至今行之已久遂不從及哲宗祔七  
室已滿僖祖太祖至神宗李邦直議父子曰世兄弟曰及乃祔  
哲宗主於東夾室焉室既隘神帳祭器至不能容乃皆  
裁削論者非之逮崇寧始改

今太廟

今太廟紹興四年創始高宗在揚州寓安祖宗神主於  
壽寧寺己酉南渡太常少卿李陵遣親事官負神主以  
行金人驅之遂失太祖神主後朝廷以重賞求之上自  
海道還神主留温州久之江端友為禮官請建太廟正  
殿七楹分為十三室祖宗十一  
室二夾室七年夏更築太廟於建  
康以臨安太廟為聖祖殿十二月復奉神主還臨安十  
六年新祭器將成而太廟室隘至不能陳列巫端明偁  
請增建太廟從之於是從西增六楹通舊十三楹每楹

卷之二  
為一室東西二楹為夾室又作西神門冊寶殿祭器庫

### 景靈東西宮

祖宗以來帝后神御皆道釋之館祖宗元豐中始倣漢原廟之制即景靈宮之東西為六殿每殿皆館御前殿以奉宣祖以下御容而後殿以奉母后各揭以美名徽宗崇寧初以景靈無隙地乃絕馳道之西立西宮以神宗為館御首哲宗次之號舊宮為景靈東宮建炎改元之二日即命有司建景靈宮於江寧帝后異殿然不克

成渡江後自聖祖以下神御皆寓温州天慶宮以祠部  
官庶知州若官使相則兼景靈宮使典奉神御趙忠簡  
為相議築宮臨安以奉神祖御而留聖祖於東嘉後不  
果紹興十三年二月始遷於臨安然但通於三殿以奉  
神容無復東都之制矣或者謂忠簡之議乃王沂公藏  
天書之意

### 今景靈宮

今景靈宮在新庄橋之西本劉光世賜第也初築三殿

聖祖居前宣祖至徽宗居中元天大聖后與祖宗諸后居後掌宮內侍七人道士十人吏卒二百七十六上元結燈樓寒食設鞦韆七夕設摩睺羅簾幙歲一易用酌獻二百四十羊凡帝后忌辰通用僧道士四七人作法事十八年增建道院二十一年韓世忠卒九月又以其賜第增築之天興殿五楹中殿七楹後殿十有七楹齋殿進食殿皆備焉期年而畢

今大內

壽慈宮

太學

三省

臨安府

今大內舊杭州州治也紹興初高宗自越復還臨安命有司裁為行宮百楹而以時內侍楊公弼董其事欲增為三百楹上不可而止蓋上日所御殿茅屋才三楹九年秦丞相用事始作慈寧宮十二年和議成因作戎政殿垂拱殿十八年乃名皇城南門曰麗正北門曰和寧二十四年建天章等六閣二十八年增築皇城東門之外城於是時禁中已復營祥曦福寧等處殿苑中有澄碧觀堂及凌虛閣等而上又自作復古殿損齋實所常

御也孝宗乾道初作選德殿淳熙中作翠寒堂今壽慈宮舊秦檜宅也故為德壽宮今太學舊岳侯宅今三省樞密院舊顯寧寺今臨安府舊祥符寺

秘書省

秘書省在天井巷之東紹興十三年創以殿前司寨為之中有殿曰右文淳熙中陳叔進樞密為秘書少監始葺省之後園頗華麗紹興末趙子直欲以為泰安宮會上意不欲遷乃止



玉津園

玉津園紹興十七年建明年金使蕭秉溫來賀天申節始燕射於是園乾道淳熙間初復燕射飲餞親王皆以為講禮之所後又有德壽宮東園集芳園太上皇后下天竺御園

睦親宅

莊文惠憲府

喜王府

東都故事宗室子皆築大舍聚居之太祖太宗九王后曰睦親秦王后曰廣親英宗二王曰賢親神宗五王曰

棣華徽宗諸王曰蕃衍渡江後宗子始散而居邑也惟親賢子孫為近屬則聚居之孝宗子四人邵悼肅王無後莊文太子魏惠憲王早薨莊文之妃惠憲之夫人皆別居賜第初莊文既大祥議者欲皇孫出居於外或以為不可又踰年竟以知樞密院府為外第焉紹興初今上封喜王將以所籍富民裴氏之居為府第而議者以為非宜乃改築蓋自紹興以來天居鮮少故不復賜宅名云

內中神御殿

內中神御殿東都舊有之號欽先孝思殿紹興十五年  
秋始創在崇政殿之東凡朔望節序生辰上皆親酌獻  
行香著用家人禮也

萬壽觀

萬壽觀以奉皇帝本命星官大殿曰純福掌觀內侍二  
人道士十一人吏卒一百五十五人道士歲費縣官錢  
七百九十二千米百二十斛紹興十七年建

太一宮

太一宮以紹興十七年建明年宮成凡一百七十楹分

六殿大殿曰靈休

奉十神太一聖像

挾殿曰瓊章寶殿

藏殿

別殿

四曰介福

上本命殿

金闕寥陽

三清明

離

火德貞君

齋明

齋殿

兩廡繪

三皇五帝至里域星官凡一百九十五每歲四立日以

籩豆祀之用素饌火禁依皇城法士民許即道院設道

場品官聽升殿宮成以秦太師為奉安太一使翊日上

親詣職事官寺監簿在京釐務官通直郎已上皆立班

道士官給糧歲為五百斛其後又詔市嘉興田三十頃以為道糧宮後小坡上有亭曰武林竹栢周遭頗清絕

孝宗受禪增建本命殿曰崇禧光宗受禪乃遷介福像于挾屋而名新殿為崇福殿

### 佑聖觀

佑聖觀孝宗舊邸也壁間有上少年時所題云富貴必從勤苦得男兒須讀五車書至今以碧紗籠寶藏之

淳熙

三年初十二月落成蓋建以奉佑聖真武靈應真君者也內塑真武像蓋肖上之御容也

### 寧壽觀

寧壽觀在七寶山之上舊名三茅堂有徽宗御畫茅君像紹興二十年賜額觀後林中可下瞰大內之宮中樓臺殿閣髣髴可見今為禁也

延祥觀

延祥觀紹興十四年建以奉四聖真君靖康末上自康邸北使將就馬小婢招兒見四金甲人各執弓劍以衛上指示衆人皆云不見顯仁后聞之曰我事四聖香火甚謹必其陰助及陷敵中每夕夜深必四十拜及曹勛

南歸后令奏上宜加崇祀以景貺云觀今在西湖上極壯麗其像以沉香斲之修繕之費皆出慈寧宮有司不與焉

顯應觀

顯應觀紹興十七年建以奉磁州崔府君在西湖之東岸昔高宗靖康北使至磁而還建炎初年王夫人夢神人自稱崔府君擁一羊謂之曰以此為識已而有娠遂

產孝宗亦異矣

崔府君東漢崔瓊也封嘉應侯

祚德廟

祚德廟始於熙寧間神宗未有聖嗣故吳居厚請為之  
紹興十六年四月立於臨安六月詔成信侯程英增忠  
定時國嗣未建故祠之且升為中祀又封為公是歲監  
察御史石埭王鎡因請行親祠高禩之禮八月改築高  
禩壇於園丘之東高咫而廣五倍十七年二月以秦丞  
相為親祠使丁未上親祠青帝於壇以伏羲高辛配又  
祀簡狄姜嫄於壇下牲用太牢玉用青幣放其王之



色樂舞如圓丘之制

郡國祖宗神御

郡國廟國朝惟祖宗所嘗幸則有之建炎初金園西京  
急留守孫昭遠遣其將王仔奉啟運神御間道走揚州  
後遷於福州而永安軍會聖宮揚州章武殿之御容則  
遷於温州天慶觀紹興十三年復奉温州神御還臨安  
於萬壽觀之後殿惟啟運留福州以守臣提舉成都府  
新繁縣御容殿者始在重光寺藥師院雍熙間僧道輝

畫太祖皇帝御容於佛屋之後壁熙寧六年趙清獻為成都守請建殿奉安神宗不許但令設板屋欄楯以扃護之元豐元年走馬承受趙選者更具奏得旨修建殿宇創置門鑰官設監守朝謁以時紹興元年終南山上清太平宮道士柴全真等復持太宗真宗御容自岐下抵宣撫使張忠獻忠獻即遣使奉安於太宗之側四年宣撫副使吳武安玠更自武興送仁宗英宗神宗御容至殿奉安二十七年楊文安椿為兵部侍郎言於朝有

旨別加營繕始更為殿門外向二十九年乃成時王時  
享知府事請賜宮額及殿名不報淳熙中胡長文入蜀  
始議即府之聖壽寺創殿以奉御容殿宇甚華供奉之  
物亦寔備乃復乞宮額於朝先是長文創雄邊軍數千  
人列營府治之側又言石室學聚川峽之士而每遇科  
舉皆歸試其鄉乞為之別立解額事未行議者因謂今  
蜀已有大學及殿前司獨欠景靈耳由是格不下令春  
秋以府通判朝謁用素饌道士讀祝文猶如紹南之禮

云

昭慈永祐殯宮儀

國朝自宣祖葬河南之永安其後六聖皆祔紹興元年  
昭慈聖獻皇后崩於越州遣告權宜擇地殯殯候軍事  
寧息歸葬園陵梓宮取周於身以為他日遷奉之便於  
是權殯於會稽縣之上皇村十二年徽宗梓宮將還宰  
相秦檜白令侍從臺諫禮官赴尚書省集議靈駕既還  
當崇奉陵寢或稱殯宮禮部員外郎眉山程敏厚希檜

意獨上奏言仍殯宮之舊稱則莫能示通和之大信而用因山之正典則無以為存本之後圖臣以為宜勿循虛名而當示大信於是議者工部尚書莫將等乃言太史稱歲不利大葬請用明德而先祫昭慈似有所避也其後高宗遣誥亦稱殯宮迄今遂循故事

### 殯宮五使

昭慈之喪以同知樞密院事李回為總護使刑部尚書胡直孺為橋道頓遞使神武左軍都統制韓世忠為總

管內侍楊公弼為都監調三衙神武輜重越州卒千三百人穿復土不置五使永佑顯仁亦如之高宗山陵始備五使如典禮

昭慈永祐顯仁永思永阜永崇六殯宮

昭慈殯宮方百步下宮深一丈五尺明器止用鉛錫置都監巡檢各一員衛卒百人生日忌辰旦望節序排辦如天章閣之議以香火院為恭寧寺永祐陵在昭慈殯宮西北五十步用地二百二十畝兩殯宮歲用祠祭錢

八千四百餘緡修繕錢五千緡顯仁皇后殯宮顯肅宮之西十九步二殯宮舊未有禁地顯仁既葬始立四隅以二十里為禁域凡民居丘墓皆遷之永思陵亦在會稽紹興末將營永阜陵趙子直以思陵之旁土薄水淺議卜於臨安之中軍寨朱晦翁亦乞於近畿改卜衆議不同復祔於會稽之域其後遂續建永崇陵焉

山陵非宰相護送

永佑之權殯也宰相秦會之不欲行乃命信安孟王忠

厚以樞密使為之及營思陵備置五使遂命右相周益公掩殯宮從所請也時左相王季海以老母惡凶事故不欲行然陵成而王卒罷永阜之役既命左相留仲至未葬而仲至逐右相趙子直亦不欲行乃以少傅保寧軍節度使郭師禹為總護使而命參知政事徐處恭持節道梓宮既葬師禹封永寧郡王子直遂得罪慶元末永崇陵將復土右相謝子肅亦不行乃命平原王韓侂胄馬山陵非宰相護送者遂為故事



成恭成穆慈懿恭淑四殯宮

初營佑陵顯肅皇后同壙後以顯仁祔之憲節皇后陪葬於佑陵故永思獨以憲聖祔孝宗在藩邸成穆已殯於臨安府南山之修吉寺乾道初成恭歿因葬其東慈懿皇后殯宮又在成穆之東神穴深九尺紅圍裏方二十有五步用成恭例也恭淑皇后殯宮在慈懿之東廣教寺

元懿太子殯所

元懿太子殯所在建康府城中鐵塔寺法堂西偏之小室無守者蓋時方巡幸庶事草創故也

莊文太子園

莊文太子園在臨安府寶林院法堂內初議以南山淨慈寺為之王日曦時為給事中言其高明顯敞與安穆安恭事體為不相稱遂改用寶林焉

秀安僖王園 濮王秀王祠堂

秀安僖王園在湖州城外之菁山紹興元年八月詔營


廟於園之正北三間二廡神門櫺星門各一座神厨齋館隨地之宜又作祠堂於臨安府櫺星門一座朝門祠堂後堂各三間挾屋兩門歇泊位庫屋巡防從人屋等又共為七十三間廟庫以安神主祠堂以藏神貌用濮園故事也濮王祠堂并神主今寓紹興之報恩寺

永佑永獻喪

徽宗初葬五國城後七年金人乃以梓宮還行在梓宮將至上服黃袍乘輦詣臨平奉迎登舟易總服百官皆

如之既至行在寓於龍德別宮以故待漏院為之待漏院在行宮南門外之東帝后異殿先是選人楊煒獻書於執政反覆言梓宮可還真偽未辨左宣義郎王之道亦貽書諫官曾統乞奏命大臣取神櫬之最下者斲而視之然後奉安既而禮官請用安陵故事梓宮入境即承之以槨有司預製袞冕翬衣以往至則納槨中不改斂欽宗之喪舉哀於天章閣南以學士院為几筵遙上陵名曰永獻既乾道中朝廷遣使求陵寢地金人許以

遷奉且併歸靖康梓宮朝廷難之金人乃以禮陪葬於  
鞏縣云



建炎雜記甲集卷二

欽定四庫全書

史部  
建炎雜記甲集卷三五至

詳校官編修臣范來宗

編修臣程嘉謨覆勘

總校官編修臣王燕緒

校對官助教臣卜維吉

謄錄監生臣魏淳曜

欽定四庫全書

建炎雜記中集卷五

宋 李心傳 撰

典禮

尊號

人主尊號自漢哀帝用方士之說始有之本朝沿唐故事每遇大禮羣臣必奉寶冊加上尊號神宗皇帝聖學高遠以清虛名無益遂罷之紹興十八年士民曹溥等



千餘人請上尊號高宗不許及遜位孝宗始奉冊加號曰光堯壽聖乾道六年上皇將加號時周益公在翰苑請用唐故事皇帝率百官詣德壽宮再表以請太上乃下誥許之禮文燦然近古所未有其後每因慶典加之至淳熙末年累加光堯壽聖憲天體道性仁誠德經武緯文紹業興統明謨盛烈凡二十四字孝宗既內禪乃上號曰至尊壽皇聖帝自後不復加光宗在壽康宮亦加聖安壽仁四字遂為奉親之典焉

年號

高宗初即位改元建炎以火德中微故也苗劉之亂以  
為炎字乃兩火故多盜明年還自海上改五年為紹興  
久之既與金議和遂不復改三十二年孝宗即位踰年  
改隆興其說以為務隆興之政及學士草制則合建隆紹  
興之義非初意矣二年王瞻叔為參知政事言趙諗謀  
逆嘗欲以隆興紀元令太常丞曾建檢事實以進上愕  
然明年勅改元乾道乾道盡九年時以為乾元用九之

數已極乃改為純熙尋又易純為淳言欲致淳化雍熙之美也十六年光宗即位將紹淳熙之政遂以紹熙紀元猶隆興意爾而學士草制則又合紹興淳熙為義亦非初意也五年上繼統趙子直為相銳意慶厯元祐故事乃改寧元盡六十而上皇及太皇繼崩中宮去世二皇子不育朝廷嫌因改明年為嘉泰云

總論南巡後禮樂

自南巡後廢事草創上祀天維揚始命即京師取祭器

法服鹵簿之屬己酉南渡悉為金人所焚紹興元年始作蒼壁黃琮十年明堂始備大樂飲福用金爵十二年將逆大母於臨平始制常行儀衛十三年始復朔日視朝之禮又行孟饗備五輅及建金雞肆赦祠祭始用牲十四年復教坊建宗學作渾天儀十五年初藉田千畝及行太廟會禮作新祭器十六年始備八寶鑄景鐘建御書院太廟拓室及賜講畢御筵十七年始命太常行園陵御史監視及賜進士聞喜宴十八年始繪配饗功

臣像於景靈宮庭之兩壁十九年始復蜡祭及諸陵薦  
新二十七年始復太廟功臣七祀之祭及諸大祀蓋自  
息兵後將二十年而禮樂始備焉

恭謝

恭謝自真宗以來每大禮畢輒行之建炎初不講紹興  
元年明堂畢命同知樞密院事富季申恭謝越州天慶  
觀温州守臣恭謝景靈宮十三年郊禮畢上詣景靈宮  
恭謝時宮始成故也舊太一宮亦恭謝十八年宮成復

舉行之自是遂為故事

大朝會

大朝會者紹興十二年十月詔來歲舉行之王望之為禮部侍郎言排辦不及請俟來年冬至既而不果十五年正月朔旦乃克行用黃麾仗三千三百五十八人視東都舊儀損三之一時無大慶殿遂權於崇政殿行之以殿狹輦出房不鳴鞭他如故事是日設宮架樂百官朝服上壽如儀自是一行而止

親耕

親耕紹興十五年詔舉行以太師秦檜為耕藉使禮官張柄請耕藉使乘金根車先詣壇所從之後檜不敢乘而止明年正月五日上服袞冕親饗先農於東郊牲用少牢配以后稷禮畢易通天冠絳紗袍親詣耕位宮架樂作上親耕九推乃止遂登親耕壇命宰執使相待從兩省臺諫行五推九推之禮庶人千畝馬時太常王湛者又請皇后就禁中親蠶不果行司農寺主簿宋樸因

請令守令以歲中春出郊勞農至今遂為故事

視學

視學祖宗以來屢行之紹興十三年國學初建明年三月上幸學祇謁先聖退御敦化堂命禮部侍郎秦熈執經國子司業高閱講易泰卦遂幸養正持志二齋賜閱三品服學官皆遷官諸生授官免解賜帛如故事時朝廷務講彌文故閱以為請承務郎胡寵聞之移書責閱希合語在儒學事中其年秋又用秘書少監楊游操之



請幸秘閣召羣臣觀晉唐書畫三代古器賜操三品服  
省官皆遷官淳熙中孝宗踵高宗故事視學命禮部侍  
郎李燾執經祭酒林先朝講大學遂幸秘書省賜省官  
燕上賦七言律詩坐者皆屬和是為兩朝盛事云

大閱

大閱者真廟景德初以契丹將犯塞始行之高宗建炎  
中常諭呂忠穆張忠獻二公欲講其禮後以避敵不果  
行隆興二年五月孝宗將閱武於近郊既涓日矣會雨

作而止乾道二年十一月始幸白石教場上登臺親御  
甲冑指授方畧命前馬步三司合教為陣戈甲耀日旌  
旗蔽野師衆歡呼作擊刺而不中節上大悅四年十月  
又大閱於茅灘時冬日可愛士民觀者如堵權主管殿  
前司公事王逵因奉觴稱壽上嘉獎之加賜諸軍中金  
四十鎰錢十餘萬緡淳熙四年十二月又大閱於茅灘  
十年十一月又大閱於龍山皆用此例

燕射

燕射祖宗承平時數行之渡江後不講乾道末孝宗嘗  
諭輔臣留意習射淳熙元年九月遂幸玉津園謀燕射  
之禮賜皇太子宰執使相侍從正任御宴酒三行樂作  
上臨軒有司進弓矢上射中太子進酒率羣臣再拜賀  
次太子及環衛官蕭奪里懶射中上再射復中的保信  
軍節度使開府儀同三司鄭藻起居舍人王卿月亦射  
中賜太子及藻奪里懶卿月襲衣金帶上賦七言詩丞  
相曾欽道以次屬和上還宮是日陰雨道無纖埃都人聳

觀歡動林野禮甫畢雨始作

北敵禮物

自和敵後金人正旦餽上金酒器六事

注碗一盞  
四盤一

色綾

羅紗縠三百段馬六匹生辰珠一袋金帶一條衣七對  
箱一合色綾羅五百段馬十疋而金主生辰正旦朝廷  
皆遺金茶器千兩銀酒器萬兩錦繒綺千匹云

北使禮節

北使至闕先遣伴使賜御筵于班荆館

在赤岸去  
府十五里

酒

七行翊日登舟至北郭稅亭茶酒畢上馬入餘杭門至都亭驛分位上賜被褥鑪等明日臨安府書送酒食閣門官入位設朝見榜儀投朝見榜子又明日入見伴使至南隅門內上御紫宸殿六參官起居北使見畢退赴客省茶酒遂燕垂拱殿酒五行惟從官得預坐是日賜茶酒名果又明日賜生餼見之二日與伴使偕往天竺寺燒香上賜沉香乳糖齋筵酒果次至冷泉亭呼猿洞而歸翌日賜內中酒果風藥花錫赴守歲夜筵酒五行

用傀儡正月朔旦朝賀禮畢上遣大臣就驛賜御筵中使傳旨宣勸酒九行三日客省簽賜酒食內中賜酒果遂赴浙江亭觀潮酒七行四日赴玉津園燕射朝廷命諸校善射者假管軍觀察行伴之上賜弓矢酒行樂作伴射官與大使並射弓館伴副使與國信副使並射弩酒九行退五日大燕集英殿尚書郎監察御史已上皆與學士撰致語六日朝辭退賜襲衣金帶大銀器臨安府書送贐儀上復遣執政官就驛賜筵晚赴解換夜筵

伴使與北使親勸酬且以衣馬為侑次日上賜龍鳳茶  
金度合乘馬出北闕門登舟宿赤岸又次日上遣近臣  
押賜御筵大凡到闕朝見射朝辭密賜大使共得中金  
千四百兩副使八百八十兩衣各三襲金帶各三條都  
管上節皆銀四百兩中下節皆三十兩衣一襲塗金帶  
副之迄今並循此例

奉使出疆賞賚

自紹興以來朝廷每遣使往北境賀生辰正旦使副及

三節人從往還皆遷一官資上中節各十人下節三十人並不許白身使賜裝錢千緡副賜八百緡銀帛各二百匹兩上節銀帛共三十中節二十五下節十五三人俸外日給五百錢探請俸十八年二月詔錢賞各半若非泛遣使則如舊

崇義公

崇義公周後也仁宗嘉祐中擇使臣柴詠者封之詠於世宗為從孫熙寧中司馬公為西京留臺請廢詠而立



郭氏後王介甫為上言豈可使世宗以得天下之故易其姓乃不行詠傳至曾孫恪為金所殺紹興五年以恪從弟承節叔為右承奉郎襲封崇義公奉周後二十六年夏叔老乃以其子國器嗣封今居衢州每朝有大禮則入侍祠如故事

衍聖公

衍聖公孔子後也歷代皆有封元祐中加賜田百頃紹興中衍聖公孔珍避難渡江上以林廟隔絕八年夏以

衢州田五頃賜之二十四年珍卒復以其子搢為右承務郎襲爵奉祀事淳熙中入侍祠擢建康守久之妄用庫金貶秩遂不復用焉紹熙初搢累遷至朝散大夫未幾卒四年秋詔以子文遠為承奉郎封衍聖公今其族人間有登進士第者

羣臣家廟

神板祭器

羣臣家廟自慶歷中宋莒公請為之後詔執政官許祀四室然當時大臣獨文潞公嘗建於河南私第他未見

也大觀四年詔公輔大臣祀五世且以祭器賜之紹興十六年上命有司為秦益公立家廟太常請建私第中門之左一堂五室五世祖居中東二昭西二穆堂飾以黝堊神板長一尺博四寸五分厚五寸八分大書某官某夫人之神座貯以帛囊藏以漆函用神幄歲四饗用孟月柔日行之具三獻有司言時享用常器常饌上倣政和故事特用制祭器賜之其後外戚吳偉等諸家及將相虞雍公楊和王吳信王皆賜祭器蓋自秦益公始

列郡拜朔表

州郡拜朔表故事惟西南北三京有之建炎二年寇院防撫諭江淮時四方多事故防始請令列郡月朔拜表如三京以示尊君親上之意從之自是遂為永制

籠門賜雨具

舊羣臣朝殿遇雨開隔門起居紹興中行之又詔從駕遇雨賜雨具景靈宮遇雨或地濕分東西立班皆特恩也

百官肩輿

故事百官出入皆乘馬建炎初上以維揚磚滑謂大臣曰君臣一體朕不忍使羣臣奔走危地可特許乘轎蓋東都舊制惟婦人得乘車其他耆德大臣或宗室屬近行尊者特旨許乘肩輿已為異禮靖康末高宗奉使至磁守宗汝霖以所乘轎進黑漆紫褥而已上猶却之蓋京百官不用肩輿所以避至尊也今行在百官非入朝無乘馬者舊在京非宰輔師相親王不得張蓋紹興後

北使至用之伴使亦然至今以為例

教坊

教坊今樂也建炎初省紹興十四年復置凡樂工四百有六十人以內侍充鈴轄紹興末復省隆興二年天申節將用樂上壽上謂宰相湯慶公等曰一歲之間止兩宮誕日外無所用不知作何名色大臣皆言臨時點集不必置教坊上曰善乾道後北使至亦用樂每歲兩至但呼市人為之孝宗天資恭儉每事如此如入殿無貴

賤皆拜惟樂工獨聲喏蓋伶倫與軍民之禮不同云

建炎雜記甲集卷三

欽定四庫全書

建炎雜記甲集卷四

宋 李心傳 撰

制作

八寶

御寶備於政和自太祖開基始有大宋受命之寶後諸  
聖嗣服皆自為一寶以皇帝恭膺天命之寶為文元符  
間既得漢傳國璽因為受命寶

受命於天  
既壽永昌

大觀初又



得良工倣古作天子皇帝六璽已而徽宗又作鎮國寶

遂天福延萬  
億永無極

通號八寶焉久之作定命寶

其文有範圍  
天地幽贊神

明保合太和萬壽無疆  
九十六字寶蔡京所賦

號九寶京城破自定命寶外悉

為敵所得而大宋受命之寶邵澤民侍郎給之隨葬乃  
得全張邦昌將復辟遣謝任伯參政奉寶歸於高宗建

炎二年秋始鑄三御寶一曰皇帝欽崇國祀之寶

印香  
合詞

表二曰天下合同之寶

印中書門  
下省之事

三曰書詔之寶

印詔  
書

皆以金為之建炎十六年郊始備八寶八寶者入內侍

省掌之紹興末上即位於重華宮時寶藏於大內太皇太后旨取之今八寶未知何人所書其文如政和之制

### 三省樞密印

三省樞密院印建炎三年秋鑄以銀為之時上命勝子濟權知叅省樞密院扈從隆祐皇太后往豫章故鑄此印

### 入宮殿諸門號

入宮殿寺諸門號皇城司掌之紹興二年正月更定其

制刺入禁門衛號八角

三千道

入殿門黃絹以方

一千道入

宮門黃絹以圓

八千道

入皇城門黃絹以長

三千道

三年十

一月更宮門號以緋紅絹方城門內以緋紅絹圓自後  
不易其制

### 禮神十二玉

禮神十二玉昊天上帝以蒼璧皇地祇以黃琮感生帝  
以四圭有邸神州地祇社稷以兩圭有邸日月以圭璧  
五帝以青圭赤璋白琥玄璜黃琮紹興初以闕祭玉但

命隨方色奠幣焉是年當大禮禮官請以木為壁繪天地之色上難之因命訪美玉以為蒼壁黃琮時明堂不祠五帝等諸神故他未及也四年明堂始制五帝日月等玉初以未得美璞將用天聖故事以珉為之既而得真玉數十斤遂命改制其中赤璋多粹美他玉多不及禮經尺寸云

### 景鍾

景鍾紹興十六年秋七月鑄鍾高九尺天子親祠上帝

則用之以皇祐忝尺為準於是上命太師秦檜銘之曰  
德純懿兮舜文維躋壽域兮熟內外薦上帝兮偉茲器  
聲氣應兮同久視貽子孫兮彌萬世鍾成冬十月上御  
射殿觀之時以雅樂多闕命給事中段拂等補造是日  
撞景鍾奏新樂正刺史以上皆與觀焉

飲福金爵

飲福金爵紹興十年明堂始用之政和大禮舊用萬壽  
玉尊時無玉尊故以金爵代之也先是大禮自天地至

從祀諸神七百七十一位當用籩豆簠簋尊彝鼎之屬九千二百五太廟用五百九十六舊用銅王者權以木代之王伯照普為國子博士嘗言今祭器皆倣聶崇義三禮圖非是請改作時多事未克行十八年始命段樞密拂等改作焉由是禮器煥然復如東都承天之故矣

### 五輅

五輅靖康中已遺敵人紹興十二年始為玉輅九月輅

成上御射殿觀之明年春遂作金象革木四輅及大安輦舊鹵簿悉用之以文繡中輿皆以纈

七寶輦

七寶輦上皇所御也紹興二年始為之有司言東都舊制輦飾以玉裙網用七寶而滴子用真珠及進呈上曰太上皇帝之意不欲如此上欲節省兼物料未易辦湯慶公等因請下禮官看詳禮官奏以塗金易玉飾梅紅絲結裙網而象牙代真珠上曰以七寶為之網零碎者

亦可辦既而上皇不肯造每至大內多乘馬而間至湖  
上則用肩輿蓋不欲煩臣民云

### 渾天儀

渾天儀古器也舊京凡四座每座約用銅二萬斤至道  
儀在測驗渾儀所皇祐間儀在翰林天文局熙寧儀在  
太史局天文院元祐儀在合臺紹興三年工部員外郎  
晉陵袁正功獻渾儀本樣命有司製之太史局請折半  
製造計用銅八千四百餘斤詔工部侍郎提舉後以巡



辛不克成時資州龍水縣士人張大楸以木為蓋言可  
備軍幕中候驗七年夏席大光為制置大使獻諸朝其  
後上在宮中自作渾儀然制差小十四年四月遂命有  
司製之內侍邵諤領其事久之乃成三十二年以授太  
史局焉

紀元統元會元歷

宣靖間用紀元歷兵興後失之司天無所考由是歷差  
一日紹興二年夏上命訪得舊歷以授史官五年正月

朔日有食之史官所定不驗時常州布衣陳得一為侍  
御史沙縣張致遠言史官立朔有訛定臘失序致遠言  
於朝遂命得一造新歷朱子發以秘書少監視即秘書  
省置局八月歷成名統元賜得一號通微處士官一子  
焉乾道淳熙稍復更定皆判太史局劉孝榮所作也紹  
熙初有武臣趙渙者言其差故命孝榮更造會元歷

### 統天歷

統天歷慶元五年京文忠鏜為丞相時所上也初會元

歷既成而布衣王孝禮言孝榮未嘗以銅表圭面測影故冬至後天朝廷然之未暇改作至慶元元年九月朔太史言月蝕夜而草澤言食在書詔楊子美秘監驗視如草澤言乃改造歷以秘書省正字馮履為叅定官履字叔常臨邛人嘗從故直徽猷閣張行成爲數學故以命之歷未成明年正月癸卯監察御史張巖言履唱爲陂辭搖撼因是遂罷去三月庚戌乃詔諸道有曉通天之歷算者所在具名來上五月歷成歷經凡三卷沿歷

他書十七種凡二十九卷又上臨安進士侯望重校萬年歷十七卷綱目二卷嘉泰二年日食五月朔太史以為午正而草澤趙大猷言午初三刻半日三分詔著作佐郎張嗣古監視渾儀秘書丞朱欽則著作王容測驗起居舍人俞澂覆言卒如大猷所言史官乃抵罪蓋自渡江後來歷差者多矣

神宗哲宗新實錄

神宗哲宗新實錄趙元鎮為相時所修也神錄有考異

哲錄有辨誣皆出范元長侍讀一手與修者任德初張子韶尹彥明高抑崇胡德輝范伯達朱喬年王信伯李似之等俱一時名人始高宗在南都以二錄成於京下之手多矯誣嘗下詔更修而未果已酉南渡國史散佚靡有孑遺其後數詔訪求之紹興元年才得布衣何克忠所藏太祖實錄四冊而已上以書籍殘缺之際特命以官已而藏里張懋家獻太祖至神宗六朝實錄會要史志等書小校唐開亦獻王珪所編五朝全要最後五

年三月始從丞相趙挺之家得蔡京所修哲宗實錄皆下之史官六年正月新神錄成八年九月新哲錄成時范元長已去官而尹彥明以秘書少監典其事元長所修神錄舊文以墨書刪去者以黃書新修者以朱書世號朱墨書

徽宗欽宗高宗孝宗光宗實錄

徽宗寔錄紹興末嘗成書始建炎兵火後史院片紙不存汪彥章內翰守湖以湖州獨不被兵當時所頒賞功

罰罪等事咸在乃因以為張本又訪諸士大夫間編集元符庚辰以來詔旨至宣和乙巳上之其書凡八百六十五卷其後修徽錄史官皆仰之然猶多脫畧淳熙中文簡仁父在史院奉詔增修之欽宗實錄洪景廬因龔實之所補日歷而修皆文直而事核高宗實錄慶元嘉泰間京冀公仲遠謝魯公子肅為丞相所上時史館無耑任未知果誰筆也孝宗光宗實錄嘉泰二年詔寶文閣學士傅伯壽直文華閣陸游同修益專以委之先是

和州布衣龔敦熙者元祐黨人厚之曾孫也嘗著符祐本末黨籍別傳等書數百卷淳熙末洪景盧領史院奏官之後光宗名改頤正朝廷以其有史學嘉泰七年七月賜出身除實錄檢討官益付以史事未幾而頤正卒乃外召傅陸還朝孝錄比他書尤踈放

#### 四朝正史

四朝正史始於李仁父而終於洪景盧乾道中仁父初入史院上四朝帝紀再還朝乃修諸志未及進書而仁



父去國時史館官多以為侍從兼職往往不能淹貫則私假朝士之有文章者代為之今四朝藝文志一書實先君子筆也淳熙中趙衛公溫叔為相史志告成仁父時守遂寧大臣言仁父之力為多特進秩一等久之列傳猶未就緒上遂召仁父成之書垂成而仁父卒乃自婺女召景廬入領內祠專典史事文踰歲而始成書焉凡列傳八百七十總一百三十五卷

紹興乾道淳熙慶元勅令格式

國朝法令大抵從寬政和後始有御筆特斷刑名是蓋多出於三尺之外矣靖康元年九月議者請叅用嘉祐元豐舊法以俟新書之成詔可尋詔律令依嘉祐斷刑依元豐明年四月復詔政和海行法非御筆修立者許引用建炎三年復避赦舉行仁宗法度即嘉祐元豐法有不同者賞格聽從重條約聽從輕時呂元直張德遠始為政也明年六月范覺民相乃奏命有司以嘉祐政和刺對修成書紹興元年八月上之其後乾道淳熙慶

元年際率十餘歲一修然大槩以紹興重修勅令格式為準

淳熙事類

淳熙事類孝宗時所修也國初但有刑統謂之律後有勅令格式與律並行若不同則從勅令格式然士大夫罕通法律而數書散漫故吏得以舞文上患之淳熙中始命勅局官取勅令格式及申明五書分門來上七年四月乃成為總門三十二別門四百二十詔頒行之賜

名淳熙事類

紹興淳熙慶元寬恤詔令

寬恤詔令者始紹興二十二年八月王瞻叔知荆門軍代還入見請命有司編集中興以來寬恤詔令而知惠州鄭康佐者亦言守令奉行詔書不虔請編類成書以賜從之二十五年九月乃成凡二百卷號紹興寬恤詔令其後淳熙慶元皆有之

淳熙書成於十二年夏慶元書編於五年終

兩朝聖政錄

光堯聖政錄者隆興乾道間所修也紹興三十二年九月以勅令所為類聖政命輔臣領之乾道二年冬蔣子禮為參知政事上其書凡三十卷上自為之序大凡分門立論視寶訓而加詳焉紹興中又為壽皇聖政錄上之其書亦三十卷

御製序文寶秘書  
少監陳傅良視草

### 中興禮書

中興禮書者淳熙中所上也紹興間太常少卿趙子晝採渡江以來所行為續因革禮三十卷其後禮官踵為

之然未上也淳熙十二年春史彌大方叔權禮部侍郎  
乃言此書一朝大典如內禪慶壽等禮皆歷代所未嘗  
行乞下禮官宣取以進仍不必推恩上許之其書凡八  
百餘卷方叔文惠王長子後終敷文閣待制

續通鑑長編

續通鑑長編者李文簡燾所修也其書倣司馬氏通  
鑑踵為之然文簡謙不敢名續通鑑故但謂之續長編  
乾道初上召文簡為史官命有司給筆札四年四月以

五朝事上之孝宗謂輔臣曰自建隆至治平百餘歲事迹備於此矣淳熙十年文簡為遂寧守始具全書自建隆至靖康凡一百六十八卷舉要六十八卷上甚重之以其書付秘書省十二年十二月又有知台州熊克上所著九朝通略詔遷一官克字子復建寧人嘗為起居郎直學士院其書視長編才十二頗訛舛十三年八月又有知龍州王偁亦獻東都事略百三十卷於朝洪內翰主之明年春除直秘閣然其書特掇取五朝史傳及四朝

實錄附傳而微以野史附益之尤疎駁偃眉山人故禮部侍郎賞之子慶元終於吏部侍郎

中興館閣書目

中興館閣書目者孝宗淳熙中所修也高宗始渡江書籍散佚紹興初有言賀方回子孫鬻其故書於道者上命有司悉市之時洪上父為少卿建言蕪湖縣僧有蔡京所寄籍因取之以實三館劉季高為宰掾又請以重賞訪求之五年九月大理評事諸葛行仁獻書百卷於



朝詔官一子十三年初建秘閣又命即紹興府借故直  
秘閣陸實家書繕藏之實農師子也十五年遂以秦伯  
陽提舉秘書省掌求遺書圖畫及先賢墨迹時朝廷既  
好文四方多來獻者至是數十年秘府所藏益充物乃  
命館職為書目其綱例皆崇文總目焉書目有三十卷

秘書監陳騏領其事五年六月上之

### 監本書籍

監本書籍者紹興末年所刊也國家艱難以來固未及

九年九月張彥實待制為尚書郎請下詔諸道州學取舊監本書籍鏤板頒賜從之然所取諸多殘缺故舊監刊六經無禮記三史無漢書二十一年五月輔臣復以為言上謂秦益公曰監中所闕之書亦令次第鏤板雖有重費亦所不惜也由是籍經復全先是王瞻叔為學官嘗請摹印諸經義疏及經典釋文許郡縣以贍學或係省錢各市一本置之於學上許之令士大夫仕於朝者率費紙墨錢千餘緡而得書一監云

建炎雜記甲集卷四

欽定四庫全書

建炎雜記甲集卷五

宋 李心傳 撰

朝事一

高宗即位冊文

淵聖北狩康王在山東羣寮請奉大統上謙讓未受時  
趙伯山延康守淮寧與諸鎮爭為盟主而宗室在京西  
或招羣賊置乘輿服御上優容之一日羣寮議纂服之

禮宗室承宣使仲宗等曰今二帝蒙塵王不當即位宜著淡黃衣稱制不改元下詔書四方稱元帥有副元帥汪廷俊等以唐肅宗故事折之參議官耿伯順語仲宗曰公是宗室豈不避嫌仲宗語塞乃定即位於南都馬五月庚寅朔王登壇告天冊文曰嗣天子臣某敢昭告於昊天上帝金人內侵二帝北狩天之戚屬混於穹居宗社罔所依憑諸夏罔知攸主臣某以道君皇帝之子奉宸旨以摠六師握大元帥之權唱義旅以先諸將冀

清京邑復兩宮而百辟卿士萬邦黎獻謂人思宋德天眷  
趙宗宜以神器屬於臣某辭之再四懼不克負荷貽羞  
於來世九州四海萬口一辭咸曰不可稽皇天之寶命  
懍懍震惕敢不欽承尚祈陰相以中興於宋祚冊文乃  
勝子濟所撰也禮成上流涕即位於府治之正衙壇在府  
治中門之東實耿伯順建議所築後名其壇曰受命中  
興之壇

中興定都本末

靖康末高宗初建元帥府於河北後聞京城破汪廷俊等遂奉王如山東久之聞張邦昌僭立廷俊等欲奉王走宿州謀渡江有先鋒至山口鎮三軍籍籍乃罷行五月王即位於南都六月李伯紀入相將奉鑾輿狩襄鄧八月伯紀去位十月上遂幸維揚時黃懋和汪廷俊為政也三年二月尼雅滿遣五千騎犯揚州上幸杭州駐蹕三月苗傅劉彥謀逆尊上為睿聖仁孝皇帝居別宮四月傅等敗上進幸江寧冬烏珠入寇上用呂元直議自明

州幸海四年春始還越州時范覺民為相後覺民罷紹興二年正月以漕運不繼復移臨安冬烏珠又入寇趙元鎮張德遠共事上幸平江時朱藏一首建避敵之議元鎮關之朱由此罷相明年敵退上復還臨安六年秋劉豫入寇上進幸平江七年春元鎮罷德遠獨相乃有建康之幸秋鄺瓊叛德遠罷元鎮復相八年二月復奉上還臨安自元鎮罷相後秦檜獨相從此不復進都矣

褒錄元祐黨籍



紹興初朝廷褒錄元祐黨人且擢用其子弟六年正月  
樞密院檢詳文字范直方言自蔡京用事凡妬賢嫉能  
助成黨論之人偶乖迎合遂致睚眦京卞欲終廢之故  
借黨以報怨如李清臣首唱異議卽加誣證大母楊畏  
反覆妄詐皆隸名石刻之人今又推恩子孫傷教敗俗  
莫此為甚請命近臣審訂而甄別之上納其言遂命給  
舍甄別元祐黨籍他日上謂趙忠簡曰一時甚有濫居  
黨人之數者范仲任申先皆能辨之先是渡江以來黨

碑無復存者凡自陳者悉以胥吏私傳之本為據紹興四年陳去非在吏部以為言始加搜訪後二年乃命甄別馬時朱子發為給事中董令升任世初為中書舍人元鎮以為賢故付以此然亦不克當意也直方蓋忠宣公孫云

籍記崇觀姦邪

建炎初言者請以崇寧以來無位人為一籍詔諫官御史具名以聞臺省各錄副本不許堂除及任守令事已

行俄命執政叅酌非罪惡深重之人皆許自新量才擢  
用時宰相黃懋和汪廷俊意也四年范覺民相吏部侍  
郎季陵上疏請收用近年廢黜之人且詔臺諫勿復論  
列敕榜朝堂臺諫沈與求等以為言陵遂坐絀紹興五  
年趙忠簡為相會右丞鄧洵仁卒詔贈官推恩如故事  
劉立道為中書舍人封還詞頭言今日之事洵仁父子  
實有力焉得死牖下已為失刑乃敢援例加恩不知上  
皇今在何地請令自今崇寧以來侍從以上如洵仁等

輩一切更不推恩自靖康初遺錄元祐諸臣然議論不  
一是非清混忠簡夙有此志以身任之因繳洵仁詞頭  
遂歷言熙豐紹聖崇觀政事人才善惡利害本末甚備  
上嘉納之命榜於朝堂焉

臨軒疎決

自真宗以來率以盛暑臨軒錄囚建炎初廢二年六月  
始詔疎決行在揚州繫囚雜犯死罪已下減一等杖以  
下釋之其後越州縣府皆同此制紹興二年六月上在

臨安甲申始臨軒疎決御史臺大理寺臨安府三衙諸軍繫囚自是遂為故事然諸道未及也五年趙元鎮為相復舉故事命諸路提刑以盛暑行之迄今不改然憲臣多不能徧所部則以諸州通判代行久之通判亦不能行第傳檄往來徒為具文而已朝廷屢戒飭之終不能革

參政分治省事

元豐官治尚書左右丞分治六曹後以為皆執政官乃

令通治省事紹興四年張魏公再入宰府上諭魏公凡事於三四大臣皆當分委張浚可專治軍旅胡松年可專治戰艦如財用亦須委一大臣後魏公相不果行七年魏公獨相三月詔尚書省常程事權令參知政事分治於是張全貞治吏禮兵房陳去非治戶刑工房九月魏公免復詔三省事令叅知政事權輪日當事更不分政常程事除相如故自是參知政事復通治省事矣

### 修政局

自王荆公秉政始創制置三司條例司以行新法其後  
蔡儋州當國踵其故置講議司儋州罷張文忠代之乃  
置政典局不隸三省靖康初徐釋之吳原中共政又置  
詳議司俄以人言罷紹興二年呂元直秦會之同相元直  
督軍於外會之欲奪其柄乃置修政局自欽之詔職事  
官及守令以上言省費裕國強兵息民之策以戶部侍  
郎黃叔敖為參詳官職局如講議司故事曾諫議說時  
為尚書郎謂會之曰宰相事無不說何以局為會之不

聽數月會之罷是日彗星出議者以為修政局所講多刻薄之事失人心致天變後五日遂罷修政局焉

### 經界法

經界法李椿年仲永所建也紹興十三年仲永為兩浙轉運副使上疏言經界不正有十害一侵耕失稅二推割不行三衙前及坊場戶虛供抵當四鄉司走弄稅名五詭名寄產六兵火後稅籍不信爭訟日起七倚閣不實八州縣隱賦多公私兩困九豪猾戶自陳稅籍不實



十逃田稅偏重故稅不行十一月癸巳疏奏上納其言  
仲永又言平江歲入昔有七十萬斛有奇今入才二十  
萬耳詢之土人其餘皆欺隱也請考按覈實自平江始  
然後推之天下因上經界畫一其法令民以所業田各  
置坵基簿圖田之形狀及其田畝數目四至土地所宜  
永為照應即田不如簿者雖有契據可執並拘入官知  
縣各為坵基簿三一留縣一送州凡漕臣若守令交承  
悉以相付詔專委仲永措置遂置局於平江周敦義遂

車事免十三年六月詔頒其法於天下仲永亦遷戶部

侍郎十五年仲永以憂去命王成可以戶部侍郎代之

成可請員外郎開封李朝正同措置又請令民十家為

甲自陳不復圖畫丈量即有隱田以給告者

正月  
辛未

成可

罷朝正權戶部侍郎

十六年二  
月丙寅

十七年春仲永免喪復

故官專一措置經界

五月  
丁卯

仲永復以結甲自陳為不便

請令州縣造圖而遣官覈寔先成有賞如慢有罰十九

年經界畢民多詣臺省訴其不均曹庭筠時為臺官因

奏仲永私結將帥曲庇家鄉請罷之更選官覈實

十一月辛

丑初朝廷既頒其法於諸道其後有司畫圖供帳分立

土色均認苗稅民始病其煩仲永既遣官屬分往諸道又覆視之議者不以為便明年二月壬子戶部請委漕臣限一季結局悉罷先所遣官三月戊戌遂下詔曰昨李椿年乞行經界初欲去民十害遂從其請今聞寢失本意可令監司將乖謬害民者日下改正時敕令所刪定官開封鄭克經界川陝四路頗峻貴州縣故蜀中增稅

亦多又官田號省庄者所租有米穀粟麥麻豆桑茶鴨  
卵之屬凡十八種皆令輸以錢故事至今尤以為患時  
馮濟川檄為瀘南撫使論於朝於是瀘叙長寧獨免經  
界仲永蓋饒州浮梁人云然諸路田稅由此始均今州  
縣坵基簿半不存典吏豪民又有走移之患矣

籍記監司郡守

紹興初樓仲輝資政為左吏請命從官舉可為監司者  
令中書籍記姓名遇缺除授上從之已而謂輔臣曰朕

亦當書之屏風以時揭帖其不任職而無他過者以自陳宮觀與之乾道初孝宗新創選德殿於御殿後作金漆大屏分畫諸道各列監司郡守而兩行以金簽標識居官者職位姓名其餘皆為華夷之圖云

隆興臺諫

隆興初湯慶公復除右僕射王諫議

大寶

上章論列不

從奉祠去自是臺諫多引退者張忠簡

闕

時為工部尚

書因奏事面請增臺諫員上曰士大夫多賣直故難其

選忠簡曰直言事之所尚陛下開納則有益於國家胡忠簡銓時為左史造朝以張公之語質上曰此語非也朕與張闡所言謂臺諫論事當辨曲直非謂賣直也明日張公請對又論臺諫一空上曰卿與胡銓昨議論一同得非傳會聖意止欲辨論其直非惡直也忠簡曰陛下當受垢納汙若校曲直是非便拒諫也上改容納之隆興時主聖臣直蓋如此

### 隆興和戰

孝宗初受禪起張魏公為江淮宣撫使上委以經略北  
事魏公欲命李顯忠邵宏淵引兵進取而史曾公以宮  
寮位執政謂強弱不敵未可進也數從中止之魏公及  
陳魯公皆主招納東北人史公尤以為不可因城洲白  
遣大府寺丞史正志志道合兩淮帥臣監司集議俾諭  
以廟堂指意志道有口辨既見魏公諭說云云魏公之  
意不回而史公亦數致書為言兵少而不精二未可恃  
魏公不聽也時上意鄉魏公故史公拜右僕射而魏公

亦拜樞密使都督江淮軍馬會顯忠宏淵進師取宿州  
命從中出三省樞密院不預知史公遂丐免不數日符  
離師潰上意亦浸疑湯丞相進之還朝復主和議由是  
魏公遂絀而海泗唐鄧商秦棄矣論者惜之

### 孝宗革冗官

孝宗初受禪以官冗恩濫議革之欲定制百官已任事  
者遇郊恩權免奉薦開賢良科令中外普薦而權罷者  
得已奏名隆興二年秋詔右諫議大夫王之望右正言



尹穡殿中侍御史晁公武叅酌來上之望言陛下即位未久恩澤未徧此二事關於士大夫者甚多願少寬之不已則宜立為奏薦限員踰數者許回受罷門客親戚漕司之職止移鄰州如是省額可減百十人此救弊之策也疏奏亦不果行至淳熙中始定奏薦員限云

上書補官

乾道初陳正獻公叅知政事時有衢州進士毛日新者以上書補文學陳公與同時相葉子昂覆奏其事且曰

陛下識其人否上曰朕不識之但見累上書陳公曰士人上書果有益國家如賈誼治安之策魏元忠防邊利害雖朝奏暮召可也今觀其書無甚可行之事此例一開恐舉人舍本業而事上書紛然何以應之又安知非假手以欺朝廷也上乃止

### 乾道郊賜

國朝故事郊祀大禮宰臣樞密使賜銀帛四千匹兩執政官三千三司使行資政殿學士五百直省已上四百

雜學士省副三百中丞給諫舍人待制各一百慶歷二  
年減冗官於是執政以上各減一千三司使減三百餘  
減二百中丞以下減三十遂為定制焉渡江以來宰臣  
郊賜匹兩不過千兩乾道六年虞忠肅為大禮使率同  
列懇辭上不許忠肅曰舊來銀一兩為錢四百絹一疋  
為錢七八百故千匹兩其直不過千餘緡今則七八千  
緡或者但言祖宗時錫予甚厚今徒多裁減不知所賜  
之直已過祖宗時數倍也叅知政事梁文靖公奏曰今

秘閣中有太祖御扎禁軍券錢至親筆裁減一二百者  
上曰雖一麻鞋之微亦經祖宗區處愛惜用度如此於  
是上遂許羣公之辭自是進書加恩率多辭賜矣

### 孝宗總核名實

孝宗總核名實於官職未嘗妄授劉忠肅為建康留守  
終更當再任上知其政績特除觀文殿學士以旌之執  
政除目云劉珙居守建康已及二年可除觀文殿學士  
再任上曰以及二年而除職非用人之體乃改云居守

建康績效顯著

淳熙慶壽禮

淳熙中再行慶壽禮時舊相史文惠以平保寧軍節度使魏國公致仕居明州陳正獻以少傅觀文殿大學士福國公致仕居興化軍十二年十一月丁未詔二公赴闕立班令明州興化軍以禮餽遺上又賜手札令勿過辭用赴廷侍陳公以道遠不能至十二月史公至江臯上遣使賜銀盒茶藥又詔都城外賜御筵及見畢對御

賜燕皆固辭甲戌入見內殿上為之曲宴且還賜第居  
之十三年春王正月庚辰朔旦上率百官簪花用樂上  
壽於康壽殿是日自人主至羣臣禁衛吏卒往還皆簪  
花癸未百官拜表稱賀於文德殿又移班秩束箋賀中  
宮史公丐以戊子辭朝上不可賜手筆留之推恩拜史  
公太傅陳公少師二月壬子賜史公玉帶金魚庚子史  
公入辭且請歸賜第詔修內史交割又命三省樞密院  
官燕飯恩數悉視文潞公禮遇之優厚自中興以來所

未有也

大理獄非得旨不得送 理官宅

自神宗置大理寺著令專一承受內降朝旨重密公事及推究內外諸司庫務侵盜官物餘民事送開封府乾道三年二月癸酉詔事涉情理巨蠹及經州縣推勘番異者方許取旨送寺七年四月辛亥又詔諸處合送寺公事並取朝旨時曹欽道為戶部尚書不以為便是歲五月詣都堂白云六曹所行最計利害若俟取朝旨恐

事政彰露犯人逃竄請先次送寺仍申朝廷照會丞相  
出劄子許之自是六曹寺監事無巨細率皆送寺矣淳  
熙十四年正順伯少卿為大理寺丞轉對言所以重天  
獄者請復舊典十月丁卯先是大理寺官散居僦舍論  
者以為非宜淳熙中乃創大第聚居之如臺諫之宅也

### 福建經界

自紹興年經界後久之諸道經界圖籍多散佚吏緣為  
奸淳熙八年閏三月癸巳新知江陰軍王師古言於朝



詔漕臣督州縣補葺八月戊辰諫官葛楚輔言其擾民  
乃止初紹興時之經界也漳泉汀三郡以何白旗作過  
之後朝廷恐其重擾故止不行然漳泉富饒未見其病  
惟汀在深山窮谷中兵火之餘舊籍無存者豪民溺稅  
常賦無矣五六郡邑無以支吾因有計口科鹽之事一  
斤之鹽至出數斤之直論者患之淳熙十四年四月福  
建轉運判官王回代還入見為上言其病不專在鹽請  
先行經界上是其言丙申以回為戶部右曹郎官往汀

措辦未至官有武臣提刑言其不便遂止之其後朱文公守漳州亦以為可行而卒不聽也

軍中承代敦減

渡江以來江上及關外諸軍使臣死亡率以宅內人承代朝廷患之乾道二年正月建康都統劉源繳納事故人付身二萬有奇樞密都統承旨龍大淵言於朝詔進官二等然統帥多庇其部曲罕能行朝廷乃許之自陳敦減補正淳熙七年三月丁丑權吏部侍郎閻蒼舒才

元言今內外報到承代官數二萬三千五百餘人請置  
取會銷落從之自後冒官率皆補正矣六部舊無圖籍  
八年七月才元始搜索氏族簿書凡七百八十冊請下  
本部收管并令他部倣此以扼奸從之

淳熙臧否郡守

孝宗留意治民紹興三十三年十一月丙申首詔諸路  
帥臣監司每日悉具部內知州治行臧否連銜聞奏後  
以多事不克行淳熙八年閏三月辛巳復命監司帥臣

歲以所部郡守臧否來上皆著事實即考察不公者御史劾十年四月丙申詔新知歸州湯鶯罷所除官已酉以知普州范仲圭為利州路轉運判官知瓊州韓碧提舉廣東常平茶鹽公事知復州閣門祇候王去惡為右領軍衛中郎將皆用監司奏臧否也十二年六月丁丑浙東安撫使鄭丙提舉常平等事勾昌泰皆坐奏臧否稽緩降官時趙衛公判江州奏言當舉劾而必臧否之不從趙公因具文以事報乃以七月乙巳詔漳州見任

守臣及監司令其精察臧否來上已除者竝到闕令都堂審察既而漳守黃啟首以臧聞遂除直秘閣再任十二年未除後又遷廣東轉運判官九月乙巳侍御史陳賈奏令諸路臧否既上而黜陟未行請令諸州見任守臣係監司所否之人許令自陳並與宮觀違者御史糾之使臧者益勸否者知勉又言諸路臧否外間多不聞知請劄下給舍臺諫其不公不實者許繳駁論奏從之十月癸亥又詔今後諸路守臣臧否限次年三月終川

廣五月終聞奏時青州蒲果知忠州為監司所否果代  
還入見上問之果曰臣得罪於監司不得罪於百姓翊  
日上諭輔臣曰蒲果誠直可取十三年潼川路漕臣岳  
霖奏知瀘州眉山史臯為否五月壬辰詔罷臯時趙昌  
裔者守全州帥臣林栗監司宋若水張柳管鑑連年以  
為否六月癸丑詔昌裔奉祠右諫議大夫陳賈言非所  
以示懲七月己丑遂寢其命十四年六月癸未江西提  
刑馬大同坐臧否稽緩降官時夔州路安撫楊輔所奏

亦久不至已丑詔詰之尋送貶秩上既留意黜陟之政由是諸道皆奉承行之然恐十餘年不免有徇私之弊上亦疑其不可盡信嘗以諭輔臣要在精擇部使者而以臺諫考察之庶乎可也

上語在十五年七月  
丙午事具宣諭聖語

### 經筵轉官裁省

故事經筵讀一書畢自儒臣修注下至中人吏士皆遷一官雖篤工廩卒無不霑被淳熙十三年冬陳大諫賈因史苑進書言酬賞泛濫上納其說於是吏輩易轉官

為磨勘者無慮三數百人議者猶以為濫十四年春陳  
又言經筵及宮讀陸贄奏議皆終篇經筵轉官者三十  
二人東宮講堂轉官循資者二百九十一人平陽郡王  
府授論語徹章轉官者二十二人至有點授論語末篇  
才一日而與轉官者冗濫極矣請自今並行裁抑官吏  
實預者量與推恩其餘竄名一切省汰或量予犒設上  
從之時人皆以為當

役設摠要



自高宗紹興中始修常平免役之令其後歲月浸久弊端益多視舊法或牴牾吏緣為奸淳熙末中書舍人莆田陳居仁詳定一司敕令因請下令敕取祖宗免役舊法及於戶部括取紹興十七年以後續降指揮精加叅考其有與舊法牴牾者悉行刪去萃為一書名曰役法撮要書成鏤板布之天下從之

建炎雜記甲集卷五